

ЖАҢА ҚАЗАҚСТАН

Ұлтымызды ұйыстырған Ұлытау



Ұлт ұясы Ұлытау – қашаннан қазаққа қайырлы қоныс болған киелі мекен. Оның төрінде елдіктің еңселі рухы, бірліктің биік байрағы бар. Көне тарихқа көз жүгіртсек те қазақтың ең тағдыршешті ұлы оқиғалары осынау қастерлі байтақтан бастау алады. Көшпелі түркі халықтары үшін теңдессіз тұлға – Шыңғыс қағанның ұлы Жошы ханның да осы кең сахарда мәңгілік барақат табуы бекер болмаса керек.

Қай жағынан алып қарасақ та Ұлытау төрі – өз құдіретімен мыңдаған жылдың бай шежіресін бауырына бүгіп жатқан темірқазық топырақ. Президентіміз Қасым-Жомарт Тоқаевтың да бұл өңірге бірнеше мәрте ат шалдыруы бекер емес. Мемлекет басшысы ретінде Ұлытауға арнайы келіп, ежелгі Алтын Орданың қайнары саналатын, Ұлық ұлыстың тұғырлы төрі есептелетін іргелі жұртқа айрықша мән беріп келеді. Бүгін де Ұлытаудың етегінде елдіктің еңсесін тіктейтін, ұлттың маңызды мәселелерін көтеретін, жарқын болашаққа жаңа жол салатын Ұлттық құрылтай шақырып, аузы дуалы, айтары бар азаматтардың басын қосты.

Тарихта белгілі ұлы құрылтайлардың көне жосығымен шақырылған маңызды кеңесті тәуелсіз қазақ елінің жаңа дәуір жолайрығы десе де болғандай. Мәні терең іс-шараға шақырту алған ұлтжанды азаматтар, белгілі тұлғалар тізіміне қарап, келелі басқосуды кезекті бір алқа деуге келмейді. Тұтастықты ту етуге жиылған Құрылтай Жаңа Қазақстанның ертеңгі болашағына баспалдақ бастамадай ұлы рухты оятаы.

Жошы хан тарихи-мәдени кешенінде ұйымдастырылған Ұлттық құрылтайдың жұмысын Мемлекет басшысы Қасым-Жомарт Тоқаевтың өзі ашты. Кіріспе сөзін Жошы хан басына Құран оқытып, тағзым етуден бастаған Президент Жаңа Қазақстанды құру сынды мұраткерлік істің дәл осы ұлт ұясы Ұлытаудың төріндегі Құрылтайдан бастау алғанын жақсылықтың нышанына жорығанын айтты.

Ұлттық құрылтайда сөйлеген сөзінде

Қасым-Жомарт Тоқаев ең алдымен жиынға арнайы шақырылған делегаттарды құттықтап, ең бірінші кезекте республикалық референдумда үлкен өзгерістерге ниет білдірген, дауыс беріп қолдаған халыққа зор алғысын жеткізді.

«Отбасымен барып, ел болашағына бейжай қарамайтынын көрсетті. Шынайы өзгеріске және жан-жақты жаңғыруға деген ұмтылысын білдірді. Келешегіміздің жарқын боларына үміті және сенімі зор екенін байқатты. Еліміз ертеңгі күнге мызғымас бірлікпен қадам басуға дайын екенін анық аңғартты. Көпшілік Ата Заңға өзгерістер енгізу туралы менің бастамамды қолдады. Дауыс беруге қатысқан барша азаматқа зор алғысымды айтамын», деді Қасым-Жомарт Тоқаев.

Президент бұдан былай барша еліміздің жаңаратынын айтты. Алайда Жаңа Қазақстан бір күнде немесе бір жылда құрылмайтынын атап өткен Қасым-Жомарт Тоқаев ол үшін үлкен-кіші, жас-кәрі бәрі бір кісідей жұмылып жұмыс істеп, ерінбей еңбек етулері керек екеніне тоқталды. Мемлекет басшысы елді бір іске ұйыстыру мақсатында Ұлттық құрылтай шақыру туралы бастама көтергенін айтты.

«Құрылтай шақыру – ертеден келе жатқан ата дәстүріміз. Бабаларымыз маңызды мәселелерді осындай алқалы жиында талқылаған. Халық өзара ақылдаса отырып, бір тоқтамға келген. Мұндай шешімдер бүкіл елді біріктірген. Төл тарихымызда ұлт тағдырын шешкен құрылтайлар болған. Оның көбі халқымыз үшін маңызды кезеңде

өткізілген. Талас құрылтайынан кейін Алтын Орда дербес мемлекет болды. Қарақұм және Ордабасы құрылтайлары жұртымызды ел қорғауға ұйыстырды. Орынбордағы бірінші қазақ құрылтайында Алаш партиясы құрылды. Екінші құрылтайда Алаш автономиясы жарияланды. Егемендік кезеңінде Дүние жүзі қазақтарының алғашқы құрылтайы өткізілді. Бұл жиында сырттағы қандастарымыз атамекенге шақырылды. Біз бабалар жолын ұстанып, Құрылтай шақыру дәстүрін жаңғырттық. Елдігімізді нығайтып, бірлігімізді бекемдейік деп, бүгін бас қосып отырмыз», деді Мемлекет басшысы.

Сонымен қатар Президент жаңа облыстың ашылуын Жаңа Қазақстан құрудағы алғашқы қадамдардың бірі болғанын атап өтті.

«Қасиетті өлкенің атауын жаңғыртып, оны Ұлытау деп атадық. Дербес облыс мәртебесі осы аймақты тың серпінмен дамытуға мүмкіндік береді. Жұмыс орындары ашылып, халықтың әл-ауқаты жақсара түседі деп ойлаймын. Жаңа нысандар, солардың ішінде әлеуметтік кешендер бой көтереді, туристік әлеуеті артады. Облыстың алғашқы қадамы алқалы жиыннан басталауда. Ұлт ұясы Ұлытаудың ғасырлар бойғы ұлы миссиясы қайта жалғасын тапты», деп атап өтті Мемлекет басшысы.

Президент жуырда өткен референдум елдегі саяси өзгерістерге ұмтылудың жарқын үлгісі екенін айта келіп, осы саяси жоба жүзеге сәтті асқаннан кейін, баз біреулердің мемлекеттің атауын өзгерту туралы айтқан пікірін сын тезіне алды. Мұның дәл қазіргі уақытта елдің қауіпсіздігіне қатер төндіретін жауапсыз шешім екенін айтты Мемлекет басшысы.

► 2

ҚҰТТЫҚТАУ

Ең қастерлі мамандық

Құрметті жерлестер! Денсаулық сақтау саласының қызметкерлері мен ардагерлері!

Сіздерді кәсіби мерекелеріңіз – Медицина қызметкерлері күнімен шын жүректен құттықтаймын!

Бұл мереке – ең қастерлі мамандық иелері ақ халатты жандардың ерен еңбегі бағаланатын күн. Олар күн сайын мыңдаған адам өмірін құтқарып, тұтас ұлт салауатының кепілі болып отыр. Біздің өңірде де кәсіби медицина саласының білікті мамандары табандылықпен еңбек етуде. Өз тарапымыздан облыстық денсаулық сақтау саласын дамыту бағытында бірқатар игі шараларды жүзеге асырудамыз – бірегей медициналық орталықтар мен бөлімшелер ашылып, заманауи жабдықтар мен қондырғылар орнатылып, жыл сайын дәрігерлер мен медбикелердің біліктілігін арттыруда жүйелі жұмыс жүргізілуде. Мұның барлығы пациенттерге жоғары технологиялық медициналық көмекке қол жеткізуге мүмкіндік береді. 2020-2021 жылдары медицина қызметкерлері коронавирус індетімен күресте алдыңғы шепте болып, өмірлерін қауіпке тігіп, адамдарға медициналық ғана емес, психологиялық көмек пен қолдау көрсете отырып, өздерінің жоғары кәсібилігін көрсетті.

Әрдайым адамзат баласы тағдырын сеніп тапсыратын мамандықтарыңызды абыроймен атқарып, халық сеніміне ие болып жүре беріңіздер.

Ел мүддесі жолындағы қиындығы мен қуанышы мол еңбектеріңізге табыс, отбасыларыңызға амандық пен саулық тілеймін! Батылдық пен мамандыққа деген адалдықтарыңыз үшін алғыс білдіремін! Мерекелеріңіз құтты болсын!

**Даниал Ахметов,
Шығыс Қазақстан облысының әкімі**

МЕДИЦИНА

Биыл 552 күрделі ота жасалды

Тек бірінші жартыжылдықта өңірде 552 жоғары технологиялық операция жасалды, былтыр 440 ота жасалған-ды. Бұл туралы облыс әкімі Даниал Ахметов өткізген халыққа сапалы медициналық көмек көрсету мәселесі бойынша кеңесте мәлім болды.

Сондай-ақ 6 медициналық жабдық сатылып алынады, бұл жоғары технологиялық медициналық қызметтердің тағы 14 түрін көрсетуге мүмкіндік бермек.

Қазір 19 дәрігер біліктілігін арттыруда, одан кейін тағы 54 маман үздік клиникаларда оқытылады, олардың 20-сы онкогематология саласында білімін шыңдайды. Сонымен қатар біздің дәрігерлер астанадағы ұлттық кардиологиялық орталықта және нейрохирургия орталығында әйгілі кардиохирург Юрий Пядан дәріс алады.

Ана мен бала орталығына заманауи зертханалық жабдық орнаттық. Ол әйел қанынан ұрықтың хромосомалық патологиясын, жүктіліктің 9-шы аптасынан бастап дауң, эд-вардс, патау синдромдарын анықтауға мүмкіндік береді. Аталған орталық алдағы уақытта жоғары технологияны қолданатын еліміздегі алғашқы медициналық мекеме болмақ, – деді аймақ басшысы.

Ержан Кеңесұлы

ВАЛЮТА БАҒАМЫ			
\$	442.17 тг.	₽	7.80 тг
€	460.21 тг	¥	65.86 тг.

МЕРЕЙТОЙ

Қарымды қаламгерге пәтер сыйлады



Аймақ басшысы Даниал Ахметов қарымды қаламгер, ақын, журналист, ұстаз, облыстың Құрметті азаматы, Жазушылар одағы өңірлік филиалының директоры Әлібек Қаңтарбаевты 75 жасқа толуымен құттықтап, мерейтой иесінің әдебиет пен публицистикаға қосқан өлшеусіз үлесін атап өтті.

Ержан ӘБІШ

– Сізді Шығыс жұрты ерекше құрметтейді. Елдегі қоғамдық-саяси маңызды оқиғаларға белсене қатысып, ой-пікіріңізді ашық білдіріп жүресіз. Ол – өте маңызды мәселе. Жазушылар одағы облыстық филиалының директоры қызметін абыроймен атқара отырып, әдебиет саласындағы өңірлік бас-тамалар мен жобаларды іске асыруға қосқан елеулі үлесіңіз үшін

сізге алғысымды білдіремін. Білім беру саласының үздігі, облыстың Құрметті азаматы атақтары мен марапаттарыңыз – мемлекеттің лайықты бағасы. Құрметті Әлеке, сізге зор денсаулық, отбасыңызға амандық, шығармашылық шабыт, мағыналы ғұмыр тілейміз! – деді облыс әкімі.

► 3

ҰБТ

75 пайызы қазақ тілінде тапсырған

Ұлттық тестілеу орталығы негізгі ҰБТ-ның аралық қорытындысын жариялады.

Дереккөзінің хабарлауынша, негізгі ҰБТ басталғалы бері елімізде 130 мыңнан астам талапкер тест тапсырған. Оның ішінде түлектердің 75,7 пайызы қазақ тілінде, 24,1 пайызы орыс тілінде, 0,1 пайызы ағылшын тілінде сынақтан өткен.

Белгілі болғандай, биылғы ұлттық бірыңғай тестілеуде шекті балды 67 пайызға жуық талапкер жинапты. Орташа балға келетін болсақ, ол 65 ұпайды құрады.

Ерекше білім беру қажеттіліктері бар талапкерлердің тестілеуді ыңғайлы тапсыруы үшін сынақ уақыты 40 минутқа ұзартылды.

«Қабылданған шаралар арқасында ерекше білім беру қажеттіліктері бар тест тапсырушылар саны артты. Егер 2021 жылы негізгі ҰБТ-ға 90 бала қатысса, биыл төрт апта ішінде тестілеуден ерекше білім беру қажеттілігі бар 415 талапкер өтті. Жалпы, негізгі ұлттық бірыңғай тестілеуге қатысу жөнінде 290 мыңға жуық өтініш келіп түскен», – делінген хабарламада.

Сәрсен Қабылым

Ауа райы		
СЕНБІ	☀ +25° +11°	☁ 5 М/С
ЖЕКСЕНБІ	☁ +25° +13°	☁ 7 М/С
ДҮЙСЕНБІ	☁ +27° +14°	☁ 4 М/С

ФЕСТИВАЛЬ

«Төр Алтай жырлайды...»

«Төр Алтай жырлайды...». Өскеменде осындай атпен тамаша бір поэзия фестивалі болып өтті. Ақындықтың ақ туын аспандатқан биылғы поэзия фестивалі Ұлт көсемі Ахмет Байтұрсынұовтың 150, заңғар жазушы М.Әуезовтің 125 және Әзілхан Нұршайықовтың, Сырбай Мәуленовтің, Сафуан Шаймерденовтің 100 жылдығына арналды.

Мейрамтай ИМАНФАЛИ

Жыр мерекесі ақындықтың алып тұлғасы Абай ескерткішіне гүл қою рәсімінен басталды. Алатаудың етегіндегі әсем қала Алматыдан Өскеменге арнайы келген Әлібек Асқаров, Мереке Құлқенов, Қасымхан Бегманов, Бауыржан Бабажанұлы, Дәурен Қуат, Дәулеткерей Кәпұлы сынды қаламгерлер ұлы ақынның рухына тағзым етіп, бас иді. Бұдан кейін келген қонақтар Шығыс Қазақстан Өнер музейіне ат басын тіреп, есімі республикаға ғана емес, шетелге де кеңінен танымал суретші Алпыс-

бай Қазығұловтың «Уақыт сәулесі» атты көрмесін тамашалап, осында жиналған оқырман қауыммен жүздесті. Бүгінгі қазақ әдебиетінің дамуы, жаңа шығармалар, өңір әдебиеті туралы жан-жақты сұхбаттасты.

Ал түстен кейін жырсуіер қауым асыға күткен поэзия фестивалі басталды. Залда жиналған қауымды облыстық мәдениет басқармасының басшысы Н.Ахметжанов құттықтап, ізгі тілегін білдірді.

► 8



Тілеубек Шаяхмет

Батырлардың ұрпағымыз

Соғысқа барған қаншама қазақ жауынгерлері болашақ ұрпақ үшін неміс басқыншыларымен соғысып, бейбіт өміріміз үшін жан аямай күресті. Соғысқа барған барлық қазақ аталарымызды батыр деуге хақымыз бар.

Сол соғыстан оралған атам Кәліш Қайыңбаев 1919 жылы Ақжар ауылында туған. 1940-1945 жыл аралығында Отан үшін от кешкен соғыс ардагері. Ұлы Отан соғысына қатысып, Ленинградты жаудан азат еткен батыр. Ол атқыштар дивизиясында болып, жаудың қаншама самолет, танкісін, фашистерді зеңбіректің оғымен жайратты. Соғыстағы ерлігі үшін алған көптеген медаль-ордендері омырауында жарқырап тұратын. Мен Абай орта мектебінде оқып жүргенде мұғаліміміз маған 9 мамыр қарсаңында «Атаңды кездесуге мектепке шақыр» дейтін. Атам ақ сары өңді, бойшаң, жауырынды, батырға сай денелі, мықты жан болған. Зағипа апамыз – әдемі, биязы жан еді. Атам Ұлы Отан соғысының ардагері болғанына мақтанатынбыз. Әрбір кездесуде атам «соғыстың қасірет екенін,

енді бейбіт заман болсын, әлемде тек тыныштық болсын» деп айтатын. Отан үшін от кешкен батыр атамыз Кәліш Қайыңбаев болса, әкеміз Қомар Қайыңбаев тыл ардагері болды. Туған жылы 1928 жылғы, 17 жасында соғыс аяқталғаннан кейін үш жыл Москвада, Волга-Дон каналын салу жұмыстарына, қираған үйлерді тазалап, орнына жаңа жаңа үйлер тұрғызуға, қираған жолдарды жөндеу жұмыстарына қатысып, маңдай терімен тылда еңбек еткен. Тыл ардагері, мектепте кәсіподақ ұйымының төрағасы, ақсақалдар ұйымының мүшесі, мал дәрігері болды. Әкем өте қоңақжай, еңбекқор, жұмысына тиянақты жан еді. Кеудесінде көптеген медаль-ордендер жарқырап тұратын. Шешем Күлжәкіш Рысқұлқызы алты бала тәрбиелеп өсірген, «Күміс алқа»

иегері болды. Әке-шешем бізді оқуға үйретіп, небір кітаптар сатып әперетін. Осылайша бәріміздің оқуға деген қызығушылығымызды арттырды. Мен университетте оқып жүргенде әкем «Біз оқымаған үлкен оқуларды сендер оқыңдар» дейтін. Әке-шешемнің айтқан аманатын орындап, ұстаз болдым. Балаларым Мерейлі ұстаз мамандығын, Шырайлы дәрігер мамандығын таңдады. Атам мен әкем соғыс және тыл ардагерлері болса, шешем – батыр ана. Аға-бауырларым мен әпке-жеңгелерім, сіңілерім – бәрі еңбек майданында абыройлы еңбек етіп жүр. Қазіргі ұрпақтардың барлығының аталары соғысқа қатысқан, олай болса қазақ елі батырлардың ұрпақтары.

Сәуле Қайыңбаева

Тарбағатай ауданы.

	Шығыс Қазақстан облысы Өскемен қаласы әкімдігінің 2022 жылғы 13 маусымдағы № 2051 ҚАУЛЫ
--	--

Мемлекет мұқтажы үшін жер учаскелерін мәжбүрлеп иеліктен шығаруды бастау туралы

«Өскемен қаласының жер қатынастары, сәулет және қала құрылысы бөлімі» мемлекеттік мекемесі ұсынған құжаттарды қарап, Қазақстан Республикасы Жер кодексінің 81-бабының 2-тармағының 2) тармақшасына, 84-бабының 2-тармағының 4) тармақшасына, 85-бабына, Қазақстан Республикасының «Мемлекеттік мүлік туралы» Заңының 6-тарауына сәйкес, «Өскемен қаласының тұрғын үй-коммуналдық шаруашылығы, жолаушылар көлігі және автомобиль жолдары бөлімі», Өскемен қаласы әкімінің 2022 жылғы 19 мамырдағы № 1/113 тапсырмалары бойынша хаттамалық шешімін ескере отырып, Өскемен қаласының әкімдігі **ҚАУЛЫ ЕТЕДІ:**

1. Қазақстан көшесің реконструкциялау және орташа жөндеуді жүргізуге байланысты, Қабанбай батыр көшесінен Мыза көшесіне дейін учаскедегі маршруттық көліктің қиру қалталары мен ортақ пайдаланылатын уақытша автомобиль тұрақтарын сәйкестікке келтіре отырып, мемлекет мұқтажы үшін жер учаскелерін мәжбүрлеп иеліктен шығару басталсын.

Мемлекеттік қажеттіліктер үшін жер учаскелерін мәжбүрлеп иеліктен шығару күні – 2022 жылғы 1 қараша.

2. «Өскемен қаласының жер қатынастары, сәулет және қала құрылысы бөлімі» мемлекеттік мекемесі осы қаулы жарияланғаннан кейін күнтізбелік 3 (үш) күннен кешіктірмей меншік иелеріне жер учаскесінің мәжбүрлеп иеліктен шығарылатыны туралы хабарлама жіберсін және заңды талап ретінде оның мемлекеттік тіркеуін жүргісін.
3. Келісімдеу рәсімдерін жүзеге асыру үшін меншік иелері «Өскемен қаласының жер қатынастары, сәулет және қала құрылысы бөлімі» мемлекеттік мекемесіне жүгінуге құқылы.
4. «Өскемен қаласының жер қатынастары, сәулет және қала құрылысы бөлімі» мемлекеттік мекемесі заңнамада белгіленген тәртіпте осы қаулыдан туындайтын басқа да шараларды қабылдасын.
5. «Өскемен қаласының ішкі саясат бөлімі» мемлекеттік мекемесі осы қаулы қабылданған сәттен бастап 3 (үш) жұмыс күні ішінде оны бұқаралық ақпарат құралдарында және қала әкімінің сайтында жарияласын.

Өскемен қаласының әкімі

Ж. Омар

Шығыс Қазақстан облысы
Өскемен қаласы әкімдігінің
2022 жылғы 13 маусымдағы
№ 2051 қаулысына қосымша

Мемлекеттік қажеттіліктер үшін иеліктен шығарылатын жылжымайтын мүлкі бар жер учаскелерінің тізбесі

№	Жер учаскесінің орналасқан жері	Нысаналы мақсаты, кадастрлық нөмірі	Ауданы, га	Жер учаскесінің меншік иесі	Иеленудің негіздемесі (құқық белгілейтін құжаттары)
1	ШҚО, Өскемен қаласы, Қазақстан көшесіндегі № 78, үйдің маңында	Аялдама кешені мен сауда павильонын орналастыру үшін 05-085-069-490	0,0098	Любовь Николаевна Грузнева	Өскемен қаласы әкімдіктің 2021 жылғы 4 қазандағы № 3986 қаулысының, 2021 жылғы 5 қазандағы № 1394 жер учаскесін уақытша өтеулі жер пайдалану (жалдау) шарты 2026 жылғы 24 қазанға дейін
2	ШҚО, Өскемен қаласы, Қазақстан көшесі, «Березка» дүкенінің маңында № 78 және 80 тұрғын үйлерге қарама-қарсы	сауда палаткаларын орнатумен көріктендіру үшін 05-085-069-1061	0,0341	Эльмира Жетыбаевна Кажибекова	Өскемен қаласы әкімдіктің 2014 жылғы 27 наурыздағы № 4480 қаулысының, 2014 жылғы 2 сәуірдегі № 481 жер учаскесін уақытша өтеулі жер пайдалану шарты, 2024 жылғы 27 наурызға дейін
3	ШҚО, Өскемен қаласы, Қазақстан көшесі, «Березка» дүкенінің қарама-қарсысында	Сауда киоскісін орналастыру үшін 05-085-069-1018	0,0012	Татьяна Владимировна Артамошина	Өскемен қаласы әкімдіктің 2021 жылғы 11 тамыздағы № 3228 қаулысының, 2021 жылғы 23 тамыздағы № 1207 жер учаскесін уақытша өтеулі жер пайдалану (жалдау) шарты, 2022 жылғы 10 тамызға дейін
4	ШҚО, Өскемен қаласы, Қазақстан көшесі, «Березка» дүкенінің маңында	Сауда киоскісін орналастыру үшін 05-085-069-1017	0,0013	Татьяна Владимировна Артамошина	Өскемен қаласы әкімдіктің 2021 жылғы 11 тамыздағы № 3228 қаулысының, 2021 жылғы 23 тамыздағы № 1204 жер учаскесін уақытша өтеулі жер пайдалану (жалдау) шарты, 2022 жылғы 10 тамызға дейін

Өскемен қаласы әкімі аппаратының басшысы

Ф. Жилибаев

Сыбайлас жемқорлыққа жол жоқ

Мемлекет басшысы, Президентіміз Қ.К.Тоқаев «Жемқорлық – мемлекеттің дамуын тежейтін кесел және оның қауіпсіздігіне де қатер төндіретін құбылыс» екенін атап айтқан болатын.

Сыбайлас жемқорлық – біздің қоғамда ең өзекті, маңызды, түбегейлі шешімі табылмай тұрған мәселе. Республикамызда бұл мәселеге қарсы күрес тәуелсіздік алған сәттен бастап мемлекеттің бірінші кезектегі міндетіне айналды.

Елімізде жемқорлыққа қарсы арнайы қабылданған заңдар да, атқарылып жатқан жұмыстар да баршылық, бірақ бұл әлі де болса толық шешімін таппаған қауіпті кеселдің бірі болып тұр.

Конституциялық тәртіпті қорғау, сыбайлас жемқорлықпен күрес аясында тиімді, бірыңғай жалпы мемлекеттік саясат жүргізу, мемлекет пен азаматтардың өмір сүруінің барлық салаларында сыбайлас жемқорлық пен оның көріністері деңгейін төмендету, қоғамның мемлекетке және оның институттарына сенімін нығайту бүгінгі күндегі басты мақсат болып табылады.

Осы мақсатта облыстық аумақтық инспекцияда «Сыбайлас жемқорлық құқық бұзушылықты болдырмау және оның алдын алу бағытында» арнайы комиссия құрылған. Комиссия төрағасы инспекция басшысы А.Қарімов тоқсан сайын комиссия отырысын өткізіп, сыбайлас жемқорлықты болдырмау және оның алдын алу, сыбайлас жемқорлық мәселелері туындаған жағдайда құқық бұзушылықтарға ықпал еткен жағдайларды жою жұмыстарын жүргізіп отырады.

Сонымен қатар облыстық инспекциядағы әдеп жөніндегі

кеңес сыбайлас жемқорлық құқық бұзушылық бойынша жұмыстарды қадағалап, жемқорлықтың алдын алу бағытында мемлекеттік қызметкерлерге түсіндіру жұмыстарын жүргізіп, арнайы іс-шаралар ұйымдастырып, видеороликтер жасап аудандарға жіберіп отырады.

Аудандық аумақтық инспекциясы облыстық комиссия отырыстарының және әдеп жөніндегі кеңестің хаттамаларында көрсетілген мәселелерді әр аптаның дүйсенбі күні өткізілетін жедел жиынында талқылап отырады және тиісті шешім қабылдап, сыбайлас жемқорлық құқық бұзушылық болдырмау бағытындағы барлық іс-шараларды жүргізеді.

Апталық жиында сыбайлас жемқорлық қылмыстар жасағаны үшін жазаның түрлері мен мөлшері, жасалған қылмыстық әрекеттің қауіптілік деңгейі мен келтірілген залалы туралы, жауапкершілік пен мемлекеттік қызметтен қуылу мәселелері айтылады.

Біздің қоғамда сыбайлас жемқорлыққа орын жоқ. Сыбайлас жемқорлыққа қарсы күреске жұрт болып жұмыла қарсы тұру қажет. Қоғамның барлық күш-жігерін біріктіріп, осы дерттің одан әрі ушықпауы үшін оны тоқтатудың барлық амалдарын қолдану арқылы ғана бұл құбылысқа тиімді түрде қарсы тұруға болады.

Сондықтан сыбайлас жемқорлықпен күресу барлық Қазақстан Республикасы азаматтарының азаматтық борышы деп білу керек, мемлекеттік іске әділ, елге, жерге, Отанға адал қызмет етейік.

С. Касымханов,
ҚР АШМ АӨК МИК Өскемен қалалық аумақтық инспекциясының бас маманы

Қоғамдық тыңдау

27.06.2022 жылдан бастап «Ө ТМК» АҚ № 3 шлам жинағышының № 2 секциясын пайдалану жобасы» жобасы бойынша 10 жұмыс күні ішінде талқылау нысанында қоғамдық тыңдаулар өткізіледі.

Жобалық құжаттамамен танысуға, ескертулер мен ұсыныстар беру үшін Бірыңғай экологиялық порталда <https://ecportal.kz/> «Жарияланған қоғамдық талқылаулар» бөлімінде болады.

Жобаға тапсырыс беруші – «Өскемен титан-магний комбинаты» АҚ тел.: 87232 23-31-48, E-mail: post@uktmp.kz.

Жергілікті атқарушы орган – «ШҚО Табиғи ресурстар және табиғат пайдалануды реттеу басқармасы» ММ тел.: 87232 25-72-06.

Бала тууына байланысты және бала бір жасқа толғанға дейін оның күтіміне байланысты жәрдемақы тағайындау

«Балалы отбасыларға берілетін мемлекеттік жәрдемақылар туралы» 2005 жылғы 28 маусымдағы Қазақстан Республикасы Заңына сәйкес, туған, асырап алынған, сондай-ақ қамқоршылыққа (қорғаншылыққа) алынған балалары бар отбасылар:

- 1) бала тууына байланысты;
- 2) бала бір жасқа толғанға дейін оның күтіміне байланысты мемлекеттік жәрдемақы алуға құқылы.

Бала тууына байланысты жәрдемақы өтініш жасалған күннен бастап тағайындалады, екі не одан көп бала туғанда жәрдемақы әр балаға тағайындалады және төленеді.

Бала күтімі жөніндегі жәрдемақы бала туған күннен бастап бір жасқа толған күнге дейін, ал баланы (балаларды) асырап алған және ата-анасының қамқорлығынсыз қалған бір жасқа дейінгі балаға қамқоршылық тағайындалған жағдайларда – баланы (балаларды) асырап алу туралы сот шешімі заңды күшіне енген күннен бастап немесе қорғаншы тағайындалған күннен бастап бала бір жасқа толған күнді қоса алған күнге дейін отбасының табысына қарамастан тағайындалады.

Бала күтімі жөніндегі жәрдемақыны тағайындаған кезде отбасы құрамында тірі туған, асырап алынған, сондай-ақ қамқоршылыққа (қорғаншылыққа) алынған балалар, егер басқа ата-ананың отбасында ескерілмесе, өгей балалар да ескеріледі.

Бұл ретте, отбасы құрамында ата-аналары ата-ана құқықтарынан айырылған балалар ескерілмейді.

Қандастарға бала күтімі бойынша жәрдемақы бала туған күннен бастап, бірақ қандас мәртебесі белгіленген күннен кейін тағайындалады.

Бала туғанда берілетін жәрдемақы мен бала күтіміне байланысты жәрдемақыны тағайындауға өтініш жасау мерзімдері бала туған күннен бастап он екі айдан аспауға тиіс.

Қоғамдық тыңдау

«ДЕЙНЕКА» ЖШС 2022 жылғы 30 маусымда үй құрылысы бойынша қоғамдық тыңдау өтетінін хабарлайды. Қоғамдық тыңдаулар Шығыс Қазақстан облысы, Өскемен қаласы, Кривов көшесі, 114 мекенжайында өтеді.

Қоғамдық тыңдау

26.07.2022 жылы сағат 15.00-де Шығыс Қазақстан облысы, Тарбағатай ауданы, Тұғыл кенті, Желтоқсан көшесі, 32 үй (әкімдік ғимараты) мекенжайы бойынша «Шығыс қазақстан облысы, Тарбағатай ауданындағы Қызылқайың молибден-мыс кен орнының 600-750 м тереңдікке дейін барлау жоспарына ықтимал әсерлер туралы есеп материалдары бойынша ашық жиналыс түрінде қоғамдық тыңдау өтеді.

Жергілікті атқарушы орган – (ЖАО) – «ШҚО Табиғи ресурстар және табиғат пайдалануды реттеу басқармасы» ММ («ШҚО ТРЖТПРБ» ММ), тел.: 8 (7232) 25-70-82, e-mail: a.eldarbekova@akimvko.gov.kz.

Тапсырыс беруші – «East Copper» ЖШС, Түркістан облысы, Отырар ауданы, Жаңа Шілік ауылы, Қ.Мұңайтпасов көшесі, 31, тел.: 8 (7252) 55-13-14, +7 775 176 0147, e-mail: info@camaltyn.com

Ықтимал әсерлер туралы есепті әзірлеуші – «Проектный центр «ПРОФЕС-СИОНАЛ» ЖШС, ШҚО, Өскемен қаласы, Н.Назарбаев даңғылы, 29/2-56, тел.: +7 705 144 84 80, e-mail: rcprof@mail.ru

Жобалық құжаттама және онлайн қатысуға белсенді сілтеме бірыңғай экологиялық порталда (БЭП) – <https://ecportal.kz/>, сондай-ақ ЖАО сайтында – e-prigoda.gov.kz «қоғамдық тыңдау» бөлімінде қолжетімді болады.

Барлық ескертулер және / немесе ұсыныстар БЭП – да, сондай-ақ ЖАО – Өскемен қаласы, К.Либкнехт көшесі, 19, «ШҚО ТРЖТПРБ» ММ мекенжайы бойынша қоғамдық тыңдаулар өткізілетін күнге дейін 3 жұмыс күнінен кешіктірілмейтін мерзімде қабылданады, тел.: 8 (7232) 25-70-82, e-mail: a.eldarbekova@akimvko.gov.kz.

ЖАРНАМА БӨЛІМІНІҢ ТЕЛЕФОНЫ: 8 (7232) 75-18-85, 87772397682

Еске алу

Ардақты да, аяулы әкеміз ЖАМИГАЗИН Аманжан Қабиұлы көзі тірі болса 19 маусымда 75 жасқа толар еді... Әкемізді сағына еске ала отырып, топырағың торқа, жаның Жәннатта нұрансын деп Алладан тілейміз.

*Әкеден асқар жоқ екен,
Әкенің сөзі оқ екен!
Қарайып жүрсе қасыңда,
Уайым-қайғы жоқ екен.*

*Өзің жайлы айта алмаймыз тауысып,
Ел айтады, жұрт айтады жарысып.
Көпшіліктен алған алғыс, сауабың,
Жатқан шығар рухыңменен қауышып.*

*Әке, көзден кеттіңіз мәңгі жырақтап,
Сенбей сізді көп іздедік біз жылап.
Кетпсіз ғой бұл өмірден мәңгіге,
О дүниені мекен қылып тұрақтап.*

*Әке деген асқар тауың, орманың,
Әке деген жұбанышың, қорғаның.
О, адамдар, бар кезінде әкені,
Қадірлейік, өкініште болмағын!*

*Адам мәңгі жүрмейді бұл жалғанда,
Көнеміз ғой тағдырдың салғанына.
Көзімізге ып-ыстық жас келеді,
Әке, өзіңді сағынып еске алғанда!*

Еске алушылар: балалары, немерелері



Еске алу

Күршім ауданы, Егіндібұлақ ауылының тумасы, Қаратоғай ауылында мектеп бітіріп, Жолнұсқау ауылында еңбек еткен анамыздың аяулы ұлы, бауыр-қарындастарының ардақты ағасы, жарының тірегі, ұл-қыздарының асқар тау әкесі, немере-жиендеріне асыл ата болған КӘДІРХАНҰЛЫ Советханды сұм ажал ортамыздан алып кетпегенде 20 маусым күні 57 жасқа толар еді. Ағатайымызды сағынышыпен еске аламыз.

*Еске аламыз ағамызды ардақты,
Үлкеніміз ақыл айтар салмақты.
Егілеміз, жылаймыз біз еске алып,
Кеңпейілді, ақ көңілді, жан-жақты.*


*Сағынамыз, сарғаямыз жабыға,
Қайғы-мұңды көтерерміз жабыла.
Қара жерді сен жатырсың жамыла,
Көзімізден ыстық жастар ағыла.*

*Достарың да көп еді ғой жаныңда,
Өзің едің тұңғышымыз, нарымыз.
Қуанушы едің үш қарындасың барына,
Қуанушы едің аға болған қос бауырыға.*

*Өзің жайлы айта алмаймыз тауысып,
Ел айтады, жұрт айтады жарысып.
Көпшіліктен алған алғыс, сауабың,
Жатқан шығар рухыңменен қауышып.*

*Топырағың торқа болсын, жан ағам,
Орың берсін Аллаң саған жұмақтан.
Жатқан жерің, жайлы болып, нұрланып,
Сәуле шашып тұрсыншы әр кез шуақтан.*

Сағына еске алушылар: анаң, қарындас-бауырларың, отбасың



SHYĞYS AQPARAT
МЕДИАХОЛДИНГ

Құрметті оқытушылар!

«Шығыс ақпарат» ЖШС

педагогикалық қызметкерлердің мақалаларын жариялауға болатын «Педагогикалық ой» республикалық журналын шығарады, мақала жариялағаны туралы сертификат және біліктілік санатын беру/растау үшін аттестаттау туралы куәліктер дайындайды.

Мына телефондар арқылы хабарласуларыңызға болады: 8 (7232) 75-44-78

